

Mid-Day Dogri News Bulletin, 11th March 2025

समे – 12:25

<><><><><><>

PM-Mauritius Arrival

प्रधानमंत्री नरेन्द्र मोदी होर अज्ज मॉरीशस पुज्जे ते मॉरीशस दे प्रधानमंत्री नवीन चन्द्र राम गुलाम होरें ब्हाई अड्डे उप्पर उंदा बड़ी गर्मजोशी कन्नै सुआगत कीता। सोशल मीडिया पोस्ट च मोदी होरें आखेआ जे ओह मॉरीशस दे प्रधानमंत्री हुंदे आस्सेआ उंदा खास ते भव्य सुआगत करने लेई बड़े आभारी न। मोदी होरें आखेआ जे एह दौरा इक करीबी दोस्त कन्नै गल्लबात करने ते बक्ख-बक्ख क्षेत्रें च सैहयोग लेई नमें रस्ते दी तपाश करने दा इक शानदार मौका ऐ। मोदी होरें आखेआ जे ओह अज्ज राष्ट्रपति धर्म गोखूल ते प्रधानमंत्री हुंदे कन्नै मलाटी करगन ते इक समुदायिक कार्यक्रम गी संबोधत बी करगन।

<><><><><><>

Schools

सरकार नै गलाया ऐ जे 43 जहार शा मते स्कूलें गी युक्तिसंगत बनाने सरबन्धी स्कीम तैहत नेड़मे स्कूलें कन्नै जोड़ेआ गेआ ऐ। आकाशवाणी दे जम्मू संवाददाता दी रिपोर्ट मूजब एमएलए राजीव जसरोटिया हुंदे सुआला दे परते च शिक्षा मंत्री सकीना इत्तू होरें गलाया जे इनें 4 जहार 349 स्कूलें शा 1 जहार 274 स्कूल जम्मू खित्ते ते 3 जहार 84 स्कूल कश्मीर खित्ते थमां न। सरकार नै गलाया ऐ जे बंद करी दित्ते गेदे जां दुए स्कूलें कन्नै जोड़ी दित्ते गेदे स्कूलें दी गिनतरी कश्मीर दे बारामुला जिले ते जम्मू खित्ते दे जम्मू जिले च सब्बने शा मती ऐ। स्कूल शिक्षा विभाग च शिक्षकें दी असामिएं दे बारे गल्ल करदे होई मंत्री होरें गलाया जे जम्मू डिवीजन च 1 जहार 665 मास्टरे, 2 जहार 218 लैक्चरें, 402 हैडमास्टरे ते 40 प्रिंसिपलें दियां असामियां खाली पेदियां न। इआं गै कश्मीर खित्ते च 1 जहार 671 मास्टरे, 1 जहार 957 लैक्चरें ते 300 हैडमास्टरे दियां असामियां खाली पेदियां न।

<><><><><><>

Unemployed Youth

सरकारै आखेआ ऐ जे जनवरी 2025 तगर 3 लख 70 जहार शा मते बेरोजगार नोजवानें रोजगार पोर्टल पर अपना नां दर्ज करोआया ऐ। आकाशवाणी दे जम्मू संवाददाता नै जानकारी दित्ती ऐ जे इनें पंजीकृत नोजवानें चा 1 लख 13 जहार बी.ए ते एम.ए तगर पढ़ाई जारी करी चुके दे ग्रैजुएट ते पोस्ट ग्रैजुएट नोजवान न। उपमुख्यमंत्री सुरिन्दर चौधरी होरें जानकारी दित्ती जे जनवरी 2025 तगर कुल 2 लख 70 जहार 84 बेरोजगार नोजवानें रोजगार पोर्टल उप्पर अपना नां दर्ज कीता ऐ। उनें आखेआ जे इक बुनियादी स्तर दे सर्वेक्षण मूजब 4 लख 73 जहार लोकें जिंदी उमर 18 थमां लेइयै 60 ब'रे दे बश्कार ऐ। उनें कम्म रोजगार करने दी इच्छेआ जाहर कीती ऐ पर इसलै ओह बेरोजगार न।

<><><><><><>

Cyber Attack

सोशल मीडिया प्लेटफार्म एक्स पर जंदी रातीं इक बड़डा साइबर हमला होआ, जेह्दे कारण इ समंच पर लोकें गी केई सारी दिक्कतें दा सामना करना पेआ। इस हमले च दुनिया भरै च एक्स दे ज्हारें उपभोक्ताएं गी अपने हेंडल तगर पुज्जने ते उसी बरतने च परेशानी औन लग्गी। इस हमले दा सब्बने शा मता असर अमरीका ते बरतानिया च दिक्खने गी लब्भा। एलोन मस्क होरें आपूं इस हमले दी तस्दीक करदे होई शैंका जताई ऐ जे एह हमला बड़े मते संसाधने कन्नै कीता गेदा ऐ ते एह्दे च पक्क गै कोई बड़डा गिरोह जां देश शामिल ऐ।

<><><><><><>

Estimates Agri Crops

कृषि ते करसान कल्याण मंत्रालय नै 2024–25 ब'रे लेई मुख्य फसलें दी पैदावार दा दुआ अगेजरा अंदाजा जारी कीता ऐ। एह्दे तैहत सौनी अन्नदाने दा उत्पादन, तकरीबन 1 जहार 664 लख मीट्रिक टन रौहने ते रबी अन्नदाने दा उत्पादन 1 जहार 645 लख मीट्रिक टन थमां बद्ध होने दी मेद ऐ। 2024–25 ब'रे लेई 1 जहार 206 लख मीट्रिक टन थमां मती मुंजी दे उत्पादन दा अंदाजा ऐ।

<><><><><><>

Unemployment Workers

सरकार नै आखेआ ऐ जे ई—श्रम पोर्टल पर 30 करोड़ 68 लक्ख शा मते असंगठित कम्मगार पंजीकृत होई चुके दे न। असंगठित कम्मगारें दा इक व्यापक राष्ट्रीय डाटाबेस बनाने आस्तै साल 2021 च एह पोर्टल शुरू कीता गेआ हा। लोकसा च अज्ज श्रम ते रोजगार मंत्री शोभा करंदलाजे होरें आखेआ जे कुल पंजीकृत कम्मगारें च 53 फीसदी शा मतियां महिलां न। उनें आखेआ जे अज्जै तोड़ी बक्ख—बक्ख केंद्री मंत्रालयें ते विभागें दी 13 योजनाएं गी ई—श्रम कन्नै जोड़ेआ गेआ ऐ। इन्दे च पी.एम स्वनिधि, प्रधानमंत्री सुरक्षा बीमा योजना, प्रधानमंत्री जीवन ज्योति बीमा योजना, प्रधानमंत्री आवास योजना—ग्रामीण ते आयुष्मान भारत प्रधानमंत्री जन आरोग योजना शामिल ऐ।

<><><><><><>

JKBOSE Inspections

पारदर्शी ते बेहतर एंगै नै मतेयान करोआने गी जकीनी बनाने लेई जम्मू कश्मीर स्कूली शिक्षा बोर्ड दी टीमें आस्सेआ सब्बै 20एं जिलें च 1कृमतेयान केन्द्र दा चानचक्क दौरा लाया गेआ। इस दरान 95 विद्यार्थीएं गी मतेयानें च नकल करदे होई फगड़ेआ गेआ ते एह्ते मतल्लक लोड़चदी कारवाई कीती गई। बोर्ड नै पारदर्शी, निरपक्ख ते बवस्थित ढंगै नै मतेयान करोआने दी अपनी वचनबद्धता गी पक्का कीता। खित्ते च इसलै 10मीं, 11मीं ते 12मीं जमात दे मतेयान चला करदे न जेह्दे इस म्हीने दे खीरै तोड़ी मुक्की जांगन।

<><><><><><>